

‘NTRUVERE TRESOTTA!

N’ātu fatte che raccontava sèmpe tatille è quište “ ‘Ntruvere Tresotta”.

Anticamènte štèa na famiglia che z’èva arreterata qua da la Puglia. ‘Štu signore facèa u cummerciant, sé non ché u cummèrce nne l’èva jute buone ca fallètte e chille c’avanzavene le solde recurrènne a la léggia, che le facètte u séquèstre. Pérò, tutte le vote che l’ufficiale giudiziarie z’appresentave pe farle u séquèstre, ‘št’ome facèa mode e manéra de scanzarle: ‘na vota facèa truà la mogliéra a liétte ammalate, na vota facèa truà la casa chiusa, inzomma šturiave sèmpe u mode ‘e ritardà u pignoramènte.

Isse cercave de trecà pecché sperave sèmpe che cacché débitore u pajasse e accusi putèa fermà u séquèstre. Na scusa mò, una dumane, arrevatte u mumènte ca ‘ntenèa chiù scuse ra mètte.

Nu tizie che fatiave dall’aucate suo’, u avvesatte ca roppe tré o quatte juorne sarija turnate l’ufficiale giudiziarie che le carbuniére. E allora quište fa na penzata, dice a la mogliéra ca ze chiamave Terésa : “ Tresotta sa c’haje penzate... pe tré o quatte juorne nne jame a jettà u pisciature ‘rrét’a u ciardine e ciu tenéme rént’a la casa, u svacame rént’a na bagnarola, ca se viénne le carbuniére le voglie fa nu riale ca ‘nze l’hanna scurdà...”.

La mogliéra u accunsentètte e accusi facènne.

Roppe quatte juorne z’appresènte l’ufficiale giudiziarie che le carbuniére. Allora isse ‘ncumènza a chiamà da sotto a la mogliéra: “ Tresotta è arrevate u sequèstre! .

Allore la mogliéra piglia nu baštone e ‘ncumènza a ‘ntruvurà ‘lla purcarija.

Isse scégne abbasce e va a ‘rrapì la porta e allucca a la mogliéra “ ntruvere Tresotta! ” e Tresotta ‘ntruverava e ‘ncoppe saglive na puzza... Mana a mane che saglivene le carbuniére, Tresotta ‘ntruverave e la puzza ze facea sèmpe chiù forte. Mamma ma’!...

U marite da sotto alluccave “ ‘Ntruvere Tresotta!” e Tresotta ‘ntruverave e la puzza ze facea sèmpe chiù forte. L’ufficiale giudiziarie n’ātu poche sbenive pe la puzza. Le carbuniére ze ‘ncazzanne pure lore ca nne putèane supputà e accusi, tutte quante acciappanne e piglianne la vija d’addò évene menute.

E grazie a ‘ssa penzata Tresotta e u marite ze sparagnanne ‘e farze fa u séquèstre...

E quanne tatille rraccuntave ‘ssu fatte nu’ ce pisciavame sotto pe la risa.